

# **D'LABRA 2016**

**7. Februar 2016 von Emo Lenz**



**Kinderfasching Fließ**

**6. Februar 2016 13:00 Uhr**

**Fließer Blochziehen**

**7. Februar 2016 12:00 Uhr**

Einleitung:

Guat, dass mi niemand kennt,  
i bin an Art **Geheimagent**.

Hon Training bei den Ami gmacht,  
wo die NSA alls überwacht.

Wenn i streck die Fühler aus,  
hear i durch d Wänd in jedes Haus,  
I lousna mit, wer telefoniert,  
i woaß wer wen mit wieviel schmiert.

Mei Lauschgerät ist überall drbei,  
wo d wichtige Leit versammelt sei.

I kümmer mi um kuan Datenschutz,  
wenn i Twitter oder Facebook nutz!

I will dia User aber schon,  
drum bring i nette Informatione.

dass sie miaße salber loche,  
wenn sie heare ihre Soche.

**I hoff, i wear s it miaße biaße,  
wenn mr a bissli schmunzle miaße!**

1 **Fuaßball** isch an geile Sport.

Da fahrt man ou oft sehr weit fort.

Und bist an Fan von Barcelona,  
tuat a Fahrt so weit sich lohna.

Um des Spiel dann live zu bsuacha,  
tuat ma glei die Reise buacha.

Und Barca isch a schiane Stadt,  
die viele Attraktione hat.

Da trifft ma nocha beim Flaniere  
an Haufa Leit mit Schal spaziere.

Ma wundret si und geiht schnell  
am Abend dann in sei Hotel.  
Man freidet si – ja gar kua Frog -  
af des Spiel am nächste Tog.  
Nach m Esse kinnt na dann in Sinn,  
iatz schalte mir den Fernseh in.  
A Fußballspiel – ja des isch fei -  
weard wohl a Wiederholung sei.  
Af uamol schießt s na durch a Kopf:  
Na, na, des isch kuan olte Zopf.  
Des isch ja live, na des isch z viel:  
des isch genau ja inser Spiel.  
O mei sei dia danach erschrocke,  
weil sie nit im Stadion hocke.  
**Na, Träne brauche kuane fliaße,  
abr schmunzla wear mr a bissli miaße!**

2 In Landeck findet s **Stadtfest** statt.  
Iatz lousnet, was sich ereignet hat:  
Da geiht a Fließer Brüderpaar  
mitnander hin wie jedes Jahr.  
Weil sie afs Bier gach reagiere,  
tia sie sich später halt verliere.  
Plötzli kimmt an Rettungswooge,  
zu dem sie an Patient hertroge.  
Da kimmt der uane Fließer Bua  
grad in dem Moment drzua.  
Erschrocke, weil er dia Turnschuach kennt,  
er aufgereggt zum Fahrer rennt.  
Er sagt er will auf jede Fall  
mit seim Bruder ins Spital.

Denn a echtes Bruderherz  
toalt mit m andre jeden Schmerz!  
Plötzli geah sei Handyfon.  
Des Bruderherz isch selber dron.  
Auf die Frag, wo er denn sei,  
seit der Guate nocha glei:  
Ja, was söll i darauf soge -  
I hock bei dir im Rettungswoge.  
Iatz stellt er mit Erstaune fest:  
des isch gar it sei Bruder gwest!  
**So lass di s iatz it fest verdriaße,  
wenn mr a bissli schmunzle miaße!**

3 Dem Mann - sonst aller **Ehren reich** -  
passiert an fürchterliche Seich:  
Af sei Wiese hei er wölle  
an nuia Pille icha stelle.  
Dass deis Ganze eppes weart,  
macht er an Ebnes, wie sich s gkeart  
und betoniert mit seiner Alulatte  
a ganz a nouble Boudaplatte.  
Nach dr Arbet mit m Holz  
spuckt in d Händ er voller Stolz,  
wia si der Pille präsentiert.  
Abr nocha sei s passiert:  
Die TIWAG hei ihm über Nacht  
an Strich durch d Rechni gmacht.  
Vom Strom a Loati geah vorbei,

und an Abstand Voarschrift sei.  
Jo, der Pille miaß verschwinde,  
er miaß an anders Platzle finde.  
Schliaßli hei er s akzeptiert  
und mit m Bagger nou probiert,  
mit Kettne und mit starke Rieme,  
da ganze Pille weiter z beame.  
Und so endet dann dia Gschicht:  
des sei gscheitert halt am Gwicht!  
**I will it Öl ins Fuir nou giaße,  
abr schmunzla wear mr a bissli miaße.**

4 Am a Balkon in **Oberschatze**  
tuat an Vougl epperm tratze:  
Auf der Loati vor seim Haus  
hockt an Rapp und lacht ihn aus.  
Dir, pass au, dir wear i geibe,  
Des wearsch mir biaße mit m Leibe!  
Er schleicht si icha ganz verstohle  
und geiht sei Büchse hole.  
So legt er an am Glander hinte  
und zielt perfekt mit seiner Flinte.  
Und sowia s da Pfetscher tuat,  
nimmt der Vogl seinen Huat.  
Es isch a bissali plamabel,  
weil troffe hei er nämli s **Kabel**.  
Die Fetze seie ochaghonge  
und s Telefon sei numma gonge.

Weil s Handy drahtlos funktioniert,  
hei er sei Service informiert,  
und der hei schnell ou reagiert  
und des Kabel repariert.

Kaum hei dia Loati endli bstande,  
tia der Rapp schua wieder lande.

Da hei der Techniker beim Giah  
zum Schütz nou auche gschria:

**So, iatz kanntest wieder schiaße,  
dass mr noumal schmunzla miaße!**

5 Va **Hochgallmigg**, da hört man melde,  
da geits schua ou a paar so Helde.

An Jager geiht da auf die Piarsch,  
zum Abschuss hat er nou an Hiarsch.

Glei schreitet durch a tiefe Schnea  
a prächtigs Exemplar dahea.

An Schuss – und Schnea fällt va den Äst,  
und nocha isch es dunkel gwest.

Und wie die Wolke sich dann lichtet,  
den muntere Hiarsch er wieder sichtet.

Er wundert zwar si - und geit zum Schluss  
ihm halt no da Gnadenschuss!

Am Ende va der netta Episode  
hat er **zwoa** Hiarsche af m Bode!

Er fasst sei Glück erst noch ra Weil,  
und i sag **doppelt** „Weidmanns Heil“!

**In Zukunft tuasch du besser schiaße,  
so wear mr a bissli schmunzla miaße.**

6 Es steht seit langem außer Streit,  
dass die **Umwelt** ins am Herze leit.  
Und die TIWAG sei gepriese,  
weil die hat s erst recht bewiese.  
Na, na Kosta scheut die kuane.  
- Iatz wissets eh schua, was mr muane.  
D Fischle tia zum Schwimme neige,  
könne abr it Treppe steige.  
Um den Staudamm z überwinde  
hat man miaße was erfinde.  
Der nuie Lift in der Runserau  
kimmt tuirer wia der Gemeindebau.  
So denkt amol, wie viel deis isch:  
fünf Millione für die Fisch!  
Ja iatz woäß i s ganz genau:  
Des schlage sie afs Stromnetz drau.  
**Na, des tuat mi schua verdriaße,  
da wear mr numma schmunzla miaße.**

7 Die **Baura** habe Sonderrechte,  
des hat a guate Seite und a schlechte.  
Die derfe d Straße all verschmutze  
und brauche sie drnach it putze.  
Will man ausdrweiche dene Tupfe,  
muaß ma fällig Templ hupfe.  
Früher sein sie gfahre mit dem Güllewage  
im Langets und im Herbst an Regetage,  
heind geits a ganz moderne Gruppe,  
die mischt sich in ra a Schlemm a Suppe  
und fahrt dann mit dem Güllemix  
s ganze Jahr und schießt sie nix.  
Schließli muaß i nou ergänze,  
Der Mist, der kennt ja kuane Grenze:

Am Maaßsteig – des isch it drlouge -  
sei er bis zu da Statione gflouge.

Am Steig, am Zaun und an da Pfosta,  
der Dreck der klebbet am Nirosta!

I mach mi zwar zum Baurafeind,  
aber des Motto hoäßt halt heind:

Leitle haltets d Nase zua,  
alle Rechte für mei Kuah!

**Fast hat i iatz nou miaßa niaße,  
da wear mr numma schmunzla miaße.**

8 Der Reini, vu r Sunna braungebrannt,  
fahrt huam vom Urlaub ganz entspannt.

Er hot sei Radla af m Autodach,  
do kinnt im Zoll oder glei danach  
sein Freund, der Didi, ihm entgege.

Der tuat it lang sich überlege  
und ruft ihn schnell am Handy an,  
und der Reini geiht ou dran.

Griaß di und - i mecht dr lei nou soge,  
du hast a Radle auf m Woge!

Tua des voar der Tür ablode,  
sinst kannt s geibe nou an Schode!

I hon des salber ausprobiert:  
miar isch sowas schua passiert.

Und weil ma lang si numma geseiche hei,  
geit s a längere Quatscherei,  
bis er steah voar seir Garage.

aber losnet iatz lei dia Blamage:

Weil er hat a liabe Frau,  
dia ihm die Tür tuat woadli au,

da isches schua passiert:

hei er s Radle weg rasiert.

Eigentli isch es it zum Lache:

Dr Didi hei s sogar gheart krache,

Dr Reinhold – dass i des ou no sog -

isch Fasnachtsobmann seit Jahr und Tog!

Zwanzg Jahr hat er den Job iatz gmacht,

und iatz hat er s ou in d Labra bracht!

**Den Reini wölle mr ganz herzli griäße,  
ou wenn mr a bissli schmunzla miaße.**

9 Die Lehrer sei heind nit z beneide,

ihr Ruaf ist leider ou bescheide.

Reformideen fülle die Register,

und jährlich wechsle die Minister.

Und wennis numme riacht nach Logik,

hoäßt des Fach dann Pädagogik.

In Fließ tia d Uhre anders ticke

da tuat ma nit so umchaflicke:

Die Nuie Mittelschual ist heind im Land

weitaus aufm modernste Stand

zwische Kufstua - oche bis af Bouze,

des verdient amol an Ehredouze!

Da lobt sogar der Schualinspektor

infern aufgeschlossene Direktor.

Dr Herbert – darf ma nit vergesse -

isch af die Technik ganz versesse.

Und wie, des zoagt a nette Gschicht

mit dem weihnachtliche Friedenslicht:

Wie sie mit der brennend Flamme keima,

will er mit ra **LED-Licht-Kerze** übernehme!

Ma heart ou mancherlei Aktion, dia er aufführt mit seir **Drohne!**  
Uane sei ja ganz verschwunde, dia hot r it amol mia gfunde!  
Hoffentli – i trau mi s bald it z so ge - hat sie niemanden drschloge!  
**So lass di s halt it fest verdriaße, wenn mr a bissli schmunzla miaße.**

10 Zur **Weihnachtsfeier** ladet seine Leit dr Naturparkboss zur rechte Zeit.  
Den Tag und Zeitpunkt und so weiter erfahren alle Mitarbeiter.  
Schliaßli waren alle informiert, Treffpunkt sei dr Faggner Wiert.  
Und weil sie alle höflich sein, trudlet jeder pünktlich ein.  
Man unterhält sich guat und lapidar, trinkt an Pfiff glei an der Bar.  
Dann hockt man sich an Tafla nieder und nocha wartet man halt wieder.  
Jetzt wars langsam Zeit zum Essen, hat der Wiert darauf vergessen?  
Der Doktr isch nit guat mia glaunt.  
Welches Essen?, fragt der Wiert erstaunt.  
Isch des Spaß und lei Humor, bei mir liegt kua Bestellung vor.  
Und wia alls nimmt so seinen Lauf, da klärt die Gschicht sich endlich auf:  
Da wo der Partl voarbstellt hei, a ganz an **anderes** Gasthaus sei!

**Schod wenn mr des vergesse liaße,  
weil mr a bissli schmunzla miaße.**

11 I kenn an nette **Taxichauffeur**,  
dem isch passiert a kluans Malheur:  
der hat – wia i bin informiert -  
an Russagast nach Zürich gführt.  
Sie keime pünktlich in Kloten an,  
sodass er den Flug erreichen kann.  
Lei hat der Chef ihm ou befohle,  
an andren Russen abzuhole!  
Voar er in die Ankunftshalle geiht  
und weil er Russisch it versteiht,  
hängt er sich - ja gar it dumm! -  
a Tafle mit dem Russenname um.  
Lei tia halt kuane Passagiere  
auf den Namen reagiere!  
Da ruuft er an sein Chef schua glei,  
der Russengast sei it drbei.  
Der Chef aber hat ihm drauf erklärt,  
der hei bei ihm sich schua beschwert.  
Wie die zwoa sich habe fahle kenne,  
will i enk aber ou no nenne:  
Auf der Tafle steiht – ma tats it gloube -  
der Name vom **erste** Fluggast doube!  
**Mi tunkt s a Pointe ganz a siaße,  
drum wear mr a bissli schmunzla miaße.**

12 Im **Zöbele**, so hon i gheart,

hei s Holz no wohl an Stelleweart!  
Da sieht an Bauer in seim Troum  
im Wald an wunderschiane Boum.  
Den umtia isch abr it legal,  
des isch ihm salber nit egal,  
drum hat er sich Gedanke gmacht,  
gscheider tuat er s in der Nacht!  
So packt er dann am Abend spat  
am Schlepper drau sei Aggregat.  
Er hat s it weit, drum isch er bald  
amol schua im stockfinstre Wald.  
Da startet dia Maschin er glei  
und wirft af a Boum an helle Schei.  
Des Liacht abr sieht ma schua vr Weite  
und erst recht vr onder Seite.  
Drum schauge d Fließer in aller Ruah  
der nächtlichen Aktion da zua!  
Und wia der Boum tia endli falle,  
wisse s d Fließer schua fast alle!  
**Den Heli weart s iatz halt verdriaße,  
wenn mr a bissli schmunzla miaße.**

13 Im Langets – brauch i enk it drzähle -  
tuat ma bei ins da wieder **wähle**.  
Wer weart's, wer tuat's, wia hoast er?  
Es geiht ja um a **Bürgermoaster**.  
Dr Bock hat Fließ im Griff und in der Fessel,  
der hockt ganz sicher in seim Sessel.  
Ja na, des stimmt iatz ja gar numme,

wer des nou globt, keart zu da Dumme.  
Iatz stellts enk grad amol so voar,  
was mir da keima isch zu Oahr:  
Da hei er wölle unterm Telefoniere  
im nuie Büro sein Chefstuhl ausprobere.  
A bissla hei er am Stuhl schua gritte,  
aber des hei s gar it glitte:  
Schua hei s an tolle Rumpler gmacht,  
und der Chef sei af a Boude kracht!  
Mein Gott, sei alle da drschrocke,  
die af dr Gemeinde doube hocke!  
Sall heie sie grad richti gnogglet:  
**ja, ja, der Bürgermuastersessel wogglet!**  
Miar hoffe für die Wahl halt lei -  
dass des kua schlechtes Omen sei!

**So , iatz wear i abr schliaße,  
i hoff es habets schmunzla miaße.**

D'LABRA 2016

Von und mit Emo Lenz

Für den Inhalt verantwortlich „FASNACHTSVEREIN Fließ“